

also stark zugesetzt / das fast alles von des Sirocco Armata zu Grund geschossen / vnd verderbet wurde / ja solcher Gestalt / das man ein erschreckliches Spectacul von den erschlagenen auch verbrennten Körper / vnd das Meer von villem vergossenen Blut rot sahe (vnd wolle der Architetto Navale hie gewarnt sein / die Sperrone oder Schnäbel an den Galeen nit zu hoch zuerbarren / sintemahlen solches vbersehen an jeho wol gespürt wurde / demnach die Türcken an iren Galeen gar hohe Proda vnd Sperone gehabt / der gestalt / das wann sie in der Eil mit dem canone di Corlia geschossen / so haben die Kuglen desselbigen darauff gegölt / vnd den Christen kein Schaden gethan) endtzwischen hat sich der Generaliss.<sup>mo</sup> Donn Giovanni di Austria (bey ime vnd auff seiner Real Galea befanden sich die besten Soldaten / sampt einem ansehnlichen Adel) mit dem Ali, gran General (welcher auff seiner grossen Galeen viel Janitscharen sampt. 100. Bogenschützen führete) in ein starkes Treffen eingelassen / vnd endlich den Ali überwunden / darauff die Christen schryen Victoria, Victoria, Victoria, nach solchẽ verlohre der Feind Hertz vnd Muth / daher der Occhiali auff alle Mittel gedachte / mit den noch vbrigen Galeen zuendweichẽ. Aber der Giovanni Andrea Doria gabe gut achtung ine Occhiali zuempfangen / wie dann auch beschah. Nichts destoweniger gieng ein scharpffes Treffen erst zu letzt mit ime an / also das es vil Christen kostete / vnd ist doch endlich er Occhiali mit. 30. oder wie etliche melden / mit. 40. seiner vnterhabenden Vasselli endtrunnen / (wie er aber hernach mit erschrecklichem Ende sein Leben beschliessen hat müssen / das wirdt zu letzt in disem Buch auch vermeld) der vberrest aber von der Türckischen Armata ist alles von den Christen erschlagen / vnd theils gefangen worden / mit grossen Frolocken vnd Dancksagung gegen dem starken vnd Allmächtigen Gott / das er den Feind vnd Bluthund also in der Christenhand gegeben / vnd sie dises Lasts endlediget.

Ein erschreckliches Spectacul der Erschlagenen Türcken.

Victoria der Christen vnd wurde der Ali vberwunden.

Der Occhiali ist endtrunnen.

Was Gestalt aber dises Treffen für ein Ansehen gehabt hat / das wird in gegenwertigem Kupfferblatt N. 20. ganz eigentlich vor Augen gestellt / nemblich

Das Kupfferblatt N. 20.

A. seind die. 6. Galeazze welche gleich zu Anfang in die Türckische Armata gesetzt / dieselbige in grosse confusion gebracht / vnd also zertrent / das sie auß ihrer Ordnung gewichen.

B. Don Giovanni di Austria Generalissimo: Allda vnd bey

C. hat er den Ali, oder den gran General der Türcken überwunden / auch sich der Türckischen General Galeen bemächtigt.

N ij D. der